

# Laud dals geniturs – tschaffen da la magistra

Experientschas suenter l'emprim onn dal curs a Turitg

DA CLAUDIA CADRUVI / ANR

■ **Geniturs e scolastas tiran ina bilantscha positiva suenter l'emprim curs per uffants rumantschs a Turitg. La gronda part dals geniturs ha en senn da puspè trametter ils uffants en il curs che cuntinua il settember.** «Nus essan casualmain vegnids sissura ch'i dat in curs per uffants rumantschs a Turitg», di l'architect *Rico Wasescha*. En l'ultim mument ha el annunzià l'onn passà sia figlia *Valerie* per il curs. Uss, suenter l'emprim onn, di il bab: «Nus avain fatg bunas experientschas.»

## Valerie chatta ina camerata

L'entschatta n'haja la figlia betg gi dad ir, raquinta il bab. Ella n'enconuschevia nagin e na chapivia sco suletta surmirana betg tge ch'ils auters raquintavan. Quai ha midà. En il fratemp ha Valerie chattà ina collega che abitescha gist en sia vischinanza e va er al curs. Perquai vul ella cuntinuar quest atun.

En sasez avess Wasescha er annunzià gudent ses figl per las lecziuns. Lez ha dentant gia in'otra occupaziun la mesemna e na po perquai betg ir.

## Emma e Josefa van u gudent

Era las duas figlas da *Natalia Knuchel* – ellas han tschintg e set onns – vulan puspè frequentar lecziuns da rumantsch. «*Emma e Josefa* van u gudent», di la mamma ch'è sezza scolasta primara. «Igl è ina buna purschida per questa vegliadetgna – betg mo leger e scriver, mabain era zambregiar, far gieus e chantar.»

Knuchel sezza è creschida si a Turitg ed ha emprèdi sursilvan da sia mamma. Ella na chapeschia betg ladin ed haja perquai l'emprim gi in pau starmet che sias mattas sajan surdumandadas. Ma las magistras en il curs chapeschian dad intermediar a moda e maniera lucca ils idioms e dialects uschia ch'ils uffants n'hajan



Trais scolastas sa deditgeschan als scolars rumantschs a Turitg e discurran cun els sche pussaivel gist l'idiom u dialect da chasa.

MAD

betg bregias cun las variantas linguisticas. «Ellas han fatg progress dapi ch'ellas van en il curs», di Knuchel. Mintgant dovrian las figlias perfin in pled ch'ella n'enconuschia anc betg. Uschia po la mamma perfin imprendere da las figlias.

## Dapli che mo lingua

Ina gronda valur haja il curs perquai che las figlias daudian che questa lingua na vegnia betg mo duvrada da la mamma. «Mia impressiun è era ch'ellas han ina meglra chapientscha da las ragischs.» Sch'insatgi dumondia uss las buobas dalonder ch'ellas derivian, ditgian ellas ch'ellas vegnian da Lumnezia malgrà ch'ellas creschan si a Turitg.

L'atun passà ha il curs da rumantsch cumenzà cun duas gruppas sin dus levels, raquinta la magistra *Victoria Mosca*. Dals scolars pli vegls hajan lura intgins chalà per sa preparar per il gimnasi u pervi dad autras occupaziuns. Ins ha cuntinuà mo cun la gruppa d'uffants fin la terza classa e singuls pli vigls.

## Trais idioms, tuatschin e jauer

L'entschatta da la lecziun possia mintga scolar tscherner tge ch'el veglia far. I dettia posts da tadlar istorgias, da zambregiar, da malegiar etc. Tranteren fetschian ins gieus cun tuts, giadora da bell'aura u emprèndia chanzuns u versets: ina giada en in idiom, lu-

ra en tschel. «Ils uffants èn s'adisads svelts als idioms», di Mosca. «La fin da l'onn han tuts chapì tschel idiom.»

Ils geniturs discurran a chasa sursilvan, vallader, surmiran u jauer. Durant las lecziuns da rumantsch èn adina preschentats trais magistras. Ils uffants pon sa drizzar a quella magistra che discurra l'agen idiom. Mosca sezza discurra vallader, puter e sursilvan. *Nora Honegger* tschantscha sursilvan e resda tuatschin. *Annatina Nay* sa sursilvan e puter.

## Flot fiss d'avair anc dapli uffants

L'eco che las magistras han survegni suenter in onn è bun. Duas terzas dals

geniturs veglian puspè trametter ils uffants en il curs, di Mosca. Era ella sezza tira ina bilantscha positiva: «Igl è in plaschair da vesair ch'ils scolars èn uschè motivads.»

Flot fiss sch'i dess anc dapli uffants ch'ins pudess cultivar anc meglia il rumantsch a Turitg.»

## Annunzias per il curs a Turitg èn anc pussaivalas

Il curs ha lieu la mesemna suentermezdi da las 14.30 fin a las 16.15 en la scola Hirschengraben a Turitg. Annunzias sajan anc pussaivalas, scrivan la Quarta Lingua e la Lia Rumantscha en ina comunicaziun.

Las lecziuns cumenzan ils 2 da settember.

En in barat ludic possian ils uffants dal chantun da Turitg e da l'Argovia profundar lur enconuschientschas linguisticas, stat scrit en la comunicaziun. Las scolastas discurrian differents idioms, i na dettia però naginas classas idiomáticas: ina persuna d'instrucziun discurra per exempel sursilvan, l'autra instruescha en ladin. Quai promova la chapientscha dals divers idioms. La purschida pussibileschia inscutters cun la lingua e cultura rumantscha er ordaifer la famiglia.

L'iniziativa dad organisar questa purschida deriva da la Quarta Lingua cun sustegn da la Lia Rumantscha.

Il curs custa 100 francs per onn da scola e per uffant.

Annunzias èn pussaivalas via [uffants@rumantsch.ch](mailto:uffants@rumantsch.ch) u sut 081 258 32 22 u per posta tar la Lia Rumantscha.